

明

詩

紀

事

明詩紀事

貴陽陳田輯

戊籤

孔天肩

天肩字汝錫汾州人嘉靖壬辰第二人及第授陝西提學僉事厯浙江布政使有文谷集四十四卷

國雅孔方伯詩方之玉琢鼎彝材良器重款識工緻特乏弘綽耳

靜志居詩話管涔山人如新訓鸚鵡雖復多言舌音終是木強
田按文谷刻意摹古五律亦自清拔

夏夜永嘉館

下馬送春色端居延夏陰流光坐自歎日暮不成吟客路連

戊鐵卷十八

滄海歸心滿舊林宵憂何所似波湧大江深

石梁

神嶺劃如闊互空橫一梁虹衢玉京路煙道羽人鄉逝水藏
金澗懸蘿暗紫房尙遲飛錫渡臨眺伫斜陽

秋思

白露沾野草商風吹前林容華忽以改寒涼時見侵四運有
承謝平生多苦辛豈不念時命積鬱終難任

歲暮深澤縣作

朔吹動寒館明暉生薄幃天空城柝散夜久客燈微處世能
誰是孤心乃獨非長思澤畔侶捐珮宜言歸

尹耕

六首

耕字子莘蔚州衛人嘉靖壬辰進士以知州罷斥徵授兵部員外郎中出爲河間知府擢河南按察僉

事坐劾戍遼左有朔野集

列朝詩集子莘爲人豪宕不羈性嗜酒喜談兵嘗爲
守廢免家居生長邊陲通知疆事痛恨武備廢弛
臣玩偶作寒語十一篇申明邊防虜勢之要害以
告當世作爲歌詩沈雄厯落秋興上谷諸篇有河朔
俠烈之風分宜當國見而才之自知州起廢數月中
遷兵部員外郎中出知河間府河間畿輔重地虜數
入犯募壯士製戎器旌旗壁壘爲之一新吏部希分
宜指稱其知兵破格改用擢河南按察司兵備僉事
仍予四品服俸令管領民兵朝諭譁然給事中張萬
紀抗疏劾奏上大怒械繫下獄雜治遣戍遼左自是
遂終身屏棄不復用矣國家急虜附鞬思將帥之臣
當取文武大畧不應以便文瑣節繩約招撫分宜得
君當國能知子莘而不能違物議以收其用議論多
而節目繁何以羅出莘之材備羯夷之患耶

鶴鵠嶺鶴鵠飛書生畫地談兵機一身恥潰千重圍
戰不止力漸竭兮鼓聲死胡兒馬上義大刀南向擲渝齊噦
指

戰城南

戰城南鼓聲沸胡陣如蛇前最銳三衝五合令轉嚴仰面看
天斜日墜胡去不苦追胡來不發矢大開陣角臥中軍凱歌
如雷四壁起

西城道中短歌

柳條當風戰猶力桃李無言混荆棘桑乾東帶斷冰流昨日
荒城作寒食君不見戰士經年挂鐵衣一身重犯數重圍紇
干山下營初散卒那峯前檄更飛年年烽火爲生計誰道沙

場春事稀

項羽墓

四方爭逐鹿三戶可亡秦何事新安卒同成馬足塵捐金行
反間撞斗失謀臣今日留坯士應慙負劍人

蔚州歌

南山陡絕石門峪西嶺斜通亂石灘敢勇近聞堪一戰莫教
容易近長安

井陘荒城日易曛阜平山下剩黃雲羯奴飲馬桑乾水愁殺
關南義勇軍

許應元十一首

應元字子春錢塘人嘉靖壬辰進士除泰安知州改

戊籤卷十八

三

泰州徵授刑部員外歷郎中出爲夔州知府遷四川

按察副使改廣西道行政使司同僉劄稿十六卷

田按嘉靖初薛君采陳約之輩倡初唐之體一時七古頗少勁健之篇隨堂楊參軍歌聲調頗壯惜集中此例不可多得耳五律亦流動自然詩綜僅錄二篇不足盡所長也

讀殷近夫集

殷侯本岸瓊氣與煙靄親一朝被組綬濩落隨風塵爲吏山水間給事金馬門榮遺志乃得道屈命茲屯壤詞發靈性逸響振青雲變彼楚執珪咄咄將誰言

題畫

煙澤彌煙雨皋陸湛渟澑春風祓修畹蘭草擢丹榮曹署雖局束書史有餘清披圖攬英秀浩蕩江洲情但恐蒙蒼滿涕

下還縱橫

楊參軍歌

楊參軍年向七十氣薄雲月清太倉雨斛粟常持一篇冰雪文前年虜入右北平上馬便繫綬胡纓厯詆燕壘一百二恨無尺筆笞懦兵今年僦居水月寺閉門著書非所志滿壁滄洲虎頭筆三足故鼎蝌蚪字昭王臺前日欲斜相逢市南酒人家小僮鼓箏不入耳春風滿庭吹落花爾來幾時不相見玉河水膠道飛畿屨如東郭有人嗤賦似長卿無客薦烈士懷奇祇自奇肯游鄴下曆沾兒但令風月且入手安問公侯能俛眉君不見荆山峩峩淮水急風雲湧洞不可測虎變龍飛二百年猶貯英靈產詞客木門倉琅詎許攀聊復對酒丹

蒼顏豫章神物身在地光芒夜夜斗牛間

獨愁

玄雲荒野盡白雪古城浮溟海闊三嶠風煙攬十洲誅求餘
壁立祿食自身謀禹貢茫茫蹟憑高送獨愁

同蔡行人子木登高里山

沓騎青林盡登臺翠甸新雲山存吏隱詞藻待王人花日移
亭午蘭風泛早春遲歸非戀賞與爾對清真

題姚大參虛谷卷

傳君棲谷口一室坐生雲地迴栽花好天空落葉聞閉門漆
園吏開卷冰雪文應自聲聞遠還隨鳴鶴聲

鶴歸亭

丹壑訪茅店遺蹤闕白雲竹陰流冉溪水去沄沄無復鶴
歸日空傳鴻寶文獨令耽寂意深覺未離羣

送翁夢山憲使觀察河南

言辭蜀道險憑軾向中州其惜春前別還登江上樓曉雲千
騎擁芳樹一樽留去後知相憶封題報瀼頭

送楊主簿之益陽

昔忝名山守同攀嶽頂雲颺來二十載京國再逢君黃綬仍
趨府青袍動出羣湘蘭與沅芷相憶採芳芬

寄徐承芳

伍公祠下吳峯曲竹裏新開孺子亭花徑祇通雙短屐茆齋
唯對一遺經此時見月殊方色夢裏羣山故國青蘆葉雁聲

推枕坐江南江北水冥冥

送黎松坡閩帥赴尙書幕府兼柬徐見山隱居

詔書新下獎元勳幕府仍看請護軍組練朝疑吳地雪油幢
畫引粵溪雲經冬碧樹工留客遠舍青山助憶君寄語南州
徐孺子待予歸伴老松筠

蔡汝楠

十首

汝楠字子木德清人嘉靖壬辰進士除行人遷刑部員外改南刑部出爲歸德知府改衡州歷四川副使江西參政山東按察使江西布政使以右副都御史巡撫河南召拜兵部侍郎改南工部有自知堂集二

於講學之後荒廢吟詠也茅坤白華樓續稿子木初釋褐競爲聲詩然錢刻藻麗過南省削洗去鉛華合響郎劉諸大家矣

藝苑卮言蔡子木詩如嬌女織流黃不知絲理強自斐然

國雅蔡司空子木聲調淵雅情興高朗其集爲用修所選者爲藝林珍賞晚歲率易應酬似出二手五言云三江看雁盡五嶺入雲多泉落雲中碓溪同樹杪

船疏鐘搖落葉細雨帶秋蟲七言云無復山門訪支遁獨留徑草待王孫此例酷似劉長卿

盛明百家詩白石訪予獨行園論詩竟日深得玄指然意每不自滿寄于虛明樓詩云登高渾漫賦何意萬人傳白石詩其可量乎

列朝詩集嘉靖初唐應得陳約之反北郡之弊變爲初唐之體後乃稍變爲中唐子木之風調得之皇甫

兄弟漸摩者居多田按子木與皇甫兄弟襟契不淺子循寄蔡衡州詩云日江頭聞送客空於詩卷恨錢郎自注云唐人

贈送卷內以不得錢起郎士元詩爲憾子昔與子木在南省時頗類此子木哭子安詩云五字沈吟詩品絕一官憔悴世途難時人以爲定論子木五律頗類皇甫第才不及耳

鵠鳴寺

龍山開古寺長傍紫微天地近多來客心空不礙禪虛窗遠岫出上界一燈燃落日回廊轉松關深暮煙

送王生還楚

來預看花候歸蓬度雁時春風留客久寒雨獨行遲煙樹吳關外鄉園漢水湄平生楚遊意因子憶江離

寄題王生艾齋

知爾歸棲處青山帶急流看裏江上宅聽雨竹間樓憑几開遺帙鳴絃寫獨愁美人思報遠猶及楚蘭秋

題峴山濟公房

禪榻澄湖上山光似鏡中疏鐘搖落葉細雨帶秋蟲峯竹虛窗映爐香別院通何期碧雲合一酌對休公

自瑞洪沂江入信州

暫得辭文牒虛窗畫舫開江趨鄱口落山向信州來接樹迷帆入殘營喚夢回同無人共登眺翹首越王臺

秋夜寄懷皇甫少玄

湖上楓林露氣清懷人遙夜月同明春征忽漫逢秋序越信何因到楚城山帶石頭亭嶂出湖回京口海天平從來謝眺吟詩地無限江淹恨別情

哭皇甫子安

與君闕下共彈冠翰墨筵中更結歡五字沈吟詩品絕一官
憔悴世途難清琴欲鼓含愁斷短札猶存掩淚看詞客招魂
終渺邈獨慙作謠似潘安

芙蓉閣

江東有靈窟梁代無僊才空留芙蓉閣遊客稱蓬萊

春江詞

溪流清且淺雲山斷還續爲唱濯纓歌聊和江妃曲

度熊飛嶺

衡南那復見來鴻嶺路高盤赤石叢百里連岡山縣小人家
都在夕嵐中

王梅

四首

梅字時魁平湖人嘉靖壬辰進士選庶吉士改刑部

主事謫判滁州有柘湖集

王文祿文脈王柘湖詩企盛唐大復之續也
野獲篇平湖王梅嘉靖壬辰選庶常初進館赴閣試

長安新秋感興詩云鵠鵠樓高瀾氣橫堯蕡商律又
敷榮六龍扶日明華袞五鳳響雲薄太清西北烽煙

新人警東南民力未忘情青袍際遇渾無補退食遲
遲愧友生當時以爲第一後授官止得主事

憲李詩繫柘湖詩歌清深老健迥然塵壘之外
靜志居詩話柘湖風神韶亮得無累之神絕句小詩
尤見情拔

寄石汀王先生二首

有引

石汀先生按浙梅時爲諸生雅承休盼斗筭黃鐘計
偕一見睽離至今風搖心旌川回目練晤言未期沈
憂空積觸事宣懷言無倫次聊軒疇昔俟諸將來耳

苦憶王夫子清時賦考槃三年不相見一札阻長安蘭雪留
形管雲山照鐵冠因風泛瑤瑟情竭賞音難

十年萊子服數口汝陽田荷篠深山裏銜杯曲水前春蘿搖
百月夕鳥下汀煙最是論文友時時詣鄭玄

在滁州與韓侍御魯宗卜築豐山東麓

知爾亨途久息機不妨高卧共巖扉山雲半落烏皮几池月
涼分白芷衣抱病秋來行藥倦故人天上尺書稀疏憇目缺
經時畧浪說東南有少微

涼州曲

記得行時約言從上樂遊昨傳書信至三歲在涼州

程璇三首

璫字子彬德州人嘉靖壬辰進士授覃懷推官累官
尙寶寺卿以忤嚴世蕃左遷起參政遷江西布政使
有右丞集

張九一綠波樓集右丞近體本之才情傳以色澤潤
汎洋洋復見正始之音

田同之安德明詩選遺子彬詩協唐音尤工五律

入日辰州道中

旅客逢人日江關信馬蹏春光微冉草色已萋萋驛道通
三楚風煙接五溪誰能將柏酒一爲解羈棲

晚赴宿州

亂山驅獨馬返照入寒林重以碧雲合淒其游子心疏離隔
吠犬灌木集鳴禽獨有孤飛雁哀鳴意不任

棧道

地險襟喉會川流南北分千峯兼萬壑匹馬遂孤雲黑水蛟龍窟青林虎豹羣不堪峻絕處天日又西曛

趙伊

五首

伊字子衡平湖人嘉靖壬辰進士授刑部主事改南
兵部厯員外郎中出爲廣西按察副使有序芳園稿

二卷

田按子衡初與皇甫子安兄弟蔡子木王維楨談詩及官南郡興湛甘泉鄒東寧鄒念菴講學詩皆脫時近宋派

贈西橋楊君

河橋連草屋深郭此幽棲釣艇近門繫蘿琴過客搘夕陽分

遠樹春水會前溪老況存詩景看雲日杖藜

泛湖

出門理棹卽湖中竟日淹留興未窮鏡水已應歸賀老習池
能免醉山公雨餘江柳迎人綠秋近園葵對酒紅朋舊追隨
負率在揮金遠慕二疏風

次友人秋夜獨坐

莫向浮名問是非乾坤落落更誰私爭妍樹木底心性逐化
魚龍自歲時草閣琴書秋正爽江城鐘鼓坐來遲懸知對月
忘懷處風竹蕭蕭入夢思

夏口偶坐

草色侵階映綠滋蒙蒙細雨暮光遲北牕高枕此何意新竹

過牆還幾枝杯酒於人休作惡交遊何處好相宜湖山見說
添形勝消得閑來兩鬢絲

和鶴椿移居韻

卜居負郭草堂靜曲浦石橋何處村幾箇沙鷗來近渚一鉤
林月挂黃昏入城小艇省徒步寄友新詩代面諭七十老翁
怡老地大椿巢鶴子還孫

錢薇

三首

薇字懋垣海鹽人嘉靖壬辰進士除行人擢禮科給事中轉右給事中隆慶初贈太常少卿有承啟堂彙

二十九卷

新茶

欲向陽羨游春雨阻行櫟山僧攜滿籠門前挂青笠

贈高卿

灤山湖邊客舫來尋曲徑煙蘿風雨連朝離思一尊子夜吳歌

庚戌膚警

薊門寒色敝高秋易水蕭蕭咽不流聞道北門虛鎖鑰左醫
關騎下涼州

吳嶽二首

嶽字汝喬汝上人嘉靖壬辰進士授戶部主事厯郎
中出爲廬州知府改保定厯山西副使浙江參政湖
廣按察使山西布政使以右僉都御史巡撫保定改

貴州進左副都御史協理院事厯吏部侍郎遷南禮
部尙書就改吏部贈太子太保謚介肅有望湖遺稿
海嶽靈秀集冢宰詩儔逸清麗入盛唐蹊徑

別二司諸公

寥廓江天遠淹留畫舫移離鷁催暮景歸棹劇鄉思泛梗年
來倦投簪老去遲憑君一盡興回首各差池

舟中感懷

百丈牽風上瀨遲杪秋霜露劇鄉思蕭條已負黃花節搖落
空看楊柳枝細雨孤舟還隱几暮雲寒笛漫傾卮羈懷正苦
未消歇隔岸誰歌白紝辭

朱衡

一首

衡字士南萬安人嘉靖壬辰進士除光溪知縣改婺源徵授刑部主事厯郎中出爲福建提學副使累官山東布政使以右副都御史巡撫山東召拜工部侍郎進南刑部尚書改工部總理河漕加太子太保有

鍾山集

宿眷野齋偶題

玄泉臨巨壑危石削層臺野鳥機都息寒松手自栽時因尋藥往日爲看雲來向夕春風至雙扉忽自開

范欽

二首

欽字堯卿一字安卿鄞人嘉靖壬辰進士除隨州知州徵授工部員外出爲袁州知府遷江西按察副使

累官右副都御史巡撫南贛遷兵部侍郎有天一閣

集

甬上耆舊集侍郎解組歸時郡中東沙張公竹墟居
公亦以事廢里居投閒嘯咏人稱爲東海三司馬侍
郎居在兩湖深處舍徑窅曲林木翳然性喜藏書起
天一閣盡購海內異本列爲四部與吳門王鳳洲家
歲以書目取較各鈔所未見相易故浙東藏書家以
范氏天一閣爲第一

靜志居詩話堯卿格律自矜第取材太近時倡和者
沈嘉則呂中甫諸人未免聲調似之

汎東湖

澄波四望空畫舸泝冷風野寺輕鷗外人家細雨中菰蒲臨
水苔洞壑與天通卽擬尋真去花源杳未窮

懷呂中父上黨

長年依帝子何似漢枚乘結客惟三晉遊人伴五陵月中催

授簡雪裏罷呼鴈會念林遊者風前思不勝

林應亮

一首

應亮字熙載侯官人知府春澤子嘉靖壬辰進士授禮部主事厯郎中出爲常德知府遷江西副使厯參政按察使布政使以右副都御史總理河道進戶部侍郎總督倉場有少峯集二卷

彭城懷古

碣石開重險江城枕上游雄圖山北聳王業水東流碧草留侯廟荒林亞父邱晚來橫笛起猶帶楚歌愁

蘇志皋

四首

志皋字德明固安人嘉靖壬辰進士除瀏陽知縣改

進賢徵授刑部主事厯員外郎中出爲廬鳳僉事厯

山西參議陝西副使謫河州知州遷陝西僉事厯山西副使陝西參政山西按察使進布政使以僉都御史巡撫遼東進右副都御史有寒邨集四卷

列朝詩集右都才情富麗沾沾自喜好作長短句
田按寒邨詩風調自佳北平詩人品在頤鷗汀之次

孤雁

寒空一雁度孤影落橫塘莫如隄邊鳥鶩鵠本自雙

扁舟圖

蘆花點綴楚山青江平舟穩夢初醒浮雲捲盡暮天碧歸雁數聲秋冥冥

採蓮曲

彭蠡湖中南贛船女郎作伴採秋蓮含羞唯恐傍人見揜入

蘆花洲子邊

初夏寄題隆興寺禪房

葡萄引蔓棗開花臺殿參差日影斜一客不來雙燕落老僧閒自曬袈裟

周復俊

一首

復俊字子纈太倉州人嘉靖壬辰進士授工部主事歷員外郎中出爲四川提學副使改雲南歷四川雲南布政使進南太僕卿有逕林集八卷

靜志居詩話子纈甄綜鄉黨之詩爲玉峯詩纂而以己詩請楊用修評點亦稱好事第諸體多膚淺不足觀

寒江

千林暝若空遙峯隱還見嵐雲凍不飛江水明素練

浦應麒

一首

應麒字道徵無錫人嘉靖壬辰進士選庶吉士授編修進春坊左贊善有后巖詩藁

碧山社次答俞廉訪

雨餘新綠布繁陰旋覺山堂花木深酒送行廚來畫舫茗攜僧供出珠林翠憐湘筠千竿玉黃惜枇杷一樹金日午鶯聲嬌百囀可能無意勸同斟

顧存仁

一首

存仁字伯剛太倉州人嘉靖壬辰進士除餘姚知縣

徵授禮科給事中以言事廷杖編管保安隆慶初起

南通政司參議遷太僕寺卿有東白草堂集四卷

西路出紫荆關

萬山急水度浮圖名胡騎曾茲犯帝都每飯豈宜忘鉅鹿防

秋先合塞飛狐雄關虎踞神州迴羣隘星羅孔道孤落日獨懸戎馬淚杞憂誰爲達天衢

包節

一首

節字元達松江華亭籍嘉興人嘉靖壬辰進士授東昌推官徵授御史以劾中官廖斌下獄遣戍莊浪衛

有侍御集六卷

歲暮詠懷

凜冽歲云暮逝節何駛駛幾歷玄冥雪渺邈天山陰荷戈未
息肩年鬢日以侵登城望故鄉睽隔如商參援琴欲鼓之恐
使淚沾襟

白悅

一首

悅字貞夫武進人嘉靖壬辰進士除戶部主事政禮
部歷員外郎中遷左春坊司直謫永平通判厯南後
軍都督府經歷吏部郎中再謫河間通判遷戶部主
事改尚寶司丞出爲江西按察僉事有雜原遺集八

卷

四庫總目悅爲尚書昂之孫家世鼎貴而獨刻意學詩
一句調華瞻神理頌清視當時襞牘者莫勝特格律未
能變化往往雷同司勳集雖原集調暢朗而思沈語婉麗而致達音和

平而易感旨雋永而難數
國雅司直詩如明月等篇出建安風骨兼貞觀思致
故宗子所謂總之詩不離唐五言者最乎
因按雖唐詩特俊殊不得其全集錄之

卧病官齋懷王江南

春色灑灑滋春愁夢思故園沙棠舟三星在戶美人遠浩月
澄河空夜流燈花照酒獨看劍短笛吟風誰倚樓同時相聚
不相樂相思莫漫相悲秋

謝少南一首

少南字應午上元人野全先生承舉子嘉靖壬辰進
士除南刑部主事遷春坊司直厯廣西提學僉事陝
西提學副使河南參政終布政使有河垣稿謫台稿

粵台稿

少室赴蒼梧賦贈時有交南之役少室著議及之
最愛平黎策無論諭蜀文相如元重漢馬季故能軍江外傳
烽火關南結陣雲誰知樽俎地制勝萬夫羣

廖希顏

六首

希顏字叔愚茶陵州人嘉靖壬辰進士除高安知縣
遷工部主事厯郎中出爲山西提學副使遷浙江按
察使有恩復堂稿四卷

沅湘耆舊集叔愚詩才俊爽評者謂其繼西涯龍湖
而起殆不誣也
田按叔愚七律氣格軒舉

訪王吏部北郭園

瀟灑王吏部好爲人所難忤俗豈忘世上書甘罷官灌園北

郭裏結社龍門灘一楓青山外蓬人白眼看

別郭漸齋

西省官聯同憲節故鄉笑語共遐方正愁戎馬徵書急况復
風煙別路長絕塞浮雲過棨戟高城華月影桃榔粵南冀北
能相憶爲寄天邊雁數行

題南山卷應潞邸教

三年爲客向并州兩見南山屬暮秋宋玉多愁應有賦梁王
高興幾登樓爐煙孔雀新屏上花氣奕奕別殿頭今日廢歌
樽酒裏瑤池豈少報應劉

次韻答澄江憲伯

坐蓬伯仲樽常滿愁入邊關思轉深白草連天還雪色黃雲

絕塞已秋陰長裾曳履成何事尺組丸泥違寸心十載自憐
通籍早人前徒解郢中吟

立夏

灌木陰陰黃鳥曉高齋兀坐思淒淒庭前生筍半成竹道上
飛花盡作泥人生幾何春又夏世路那堪東復西清吟淺酌
且自慰芳草天涯甯久迷

遊雁宕

中峯石戴七星芒拄石青藤九尺長四十八盤天上路東邊
回首是扶桑

李徵 一首

徵字誠之常德桃源人嘉靖壬辰進士累遷禮科給

事中出爲江西按察副使遷浙江參政有元光漫稿

五卷

秋夜雨花堂對月

秋月禪心相對清露華飛墮葛衣輕爐熏茗椀煙初歇坐聽
遙空雙鶴鳴

王廷幹

一首

廷幹字維楨涇人嘉靖壬辰進士除行人遷南刑部

主事改戶部厯員外郎中出爲九江知府有嚴潭集

田按皇甫子循上大司徒書云廷幹與越郡蔡汝楠並以弱齡漸翼鵠鵠雙曜麗采馳聲藝苑雖終賈復作嚴路再生蔑以加焉亦友扇假藉之詞耳今核所作殊不盡然

鶴出長安

聖后乘時豫鸞車出漢宮雕戈明曉日寶轡拂晴虹輦設謳
歌起山川畿甸雄侍臣徒仰德拜手奏南風

沈越

一首

越字中甫南京錦衣衛人嘉靖壬辰進士除羅田知
縣改平江徵授山東道御史謫開州通判厯衛輝推
官德安同知有麓村詩草新亭漫稿

金陵瑣事沈韓峯越工小令鑄而御史能爲風流艷
媚語賦梅花者豈獨宋廣平乎

懷方孔朋

梅花吹雨日連華綠漲陂塘已拍天爲念故人生計薄一簷

春水種湖田

秦鳴夏

一首

鳴夏字子亨臨海人嘉靖壬辰進士選庶吉士授編修進中允以事罷歸起兵部主事

送湖龍山別駕

君行不可留綠柳暗江頭春色隨征旆浮雲生暮愁孤衷懷楚璧壯志拂吳鈎湖海他年夢能忘天姥遊

姚虞

一首

虞字宗舜莆田人嘉靖壬辰進士官御史有焚餘詩

集

洗少翁讀書臺

卜築煙霞外幽棲豈避名小窗時讀易竹院每逢僧倚閣峯相對當秋月自明閒雲來洞口盡日鎖柴扃

高應冕

五首

龐冕字文中仁和人嘉靖甲午舉人授綏甯知縣遷

光州知州有白雲山房集

國雅高光州文中才致清贍聲調遒捷平平寫出亦
自沈游如黃鳥歌聲悲秦亡自此始滌捲海門山雪
拂天際烏經聲出院少草色上階多是中唐語
田按文中五字詩清穩有韋王遺意歸田後與閩縣
祝汝亨時奉新安王仲房寘錢唐方禹續九紋童仲
良漢臣和劉安元子伯沈懋學仕結社於西湖曰
紫陽湖心玉岑飛來月巖南屏紫雲洞霄凡入社今
所傳西湖八社詩帖是也

靈峯寺訪少岳張山人不遇憩聽泉石

山秋鬱蒼蒼禪林轉幽寂因躡靈峯雲偶憩聽泉石泉流何
清冷石古苔蘚碧洗心悅真境松風引孤策何處覓知音還
候山中客

憶中峯舊遊寄問竇竹上人

幾年別中峯羣山宛在目松濤帶江聲石門轉谿曲不知舊
遊徑新長幾竿竹可有殘霞人還過白雲宿

舟宿江口

煙水洞庭秋蒼茫日沈夕潮落江聲迴鳥下雲林急月高漁
未歸山昏寺鐘寂獨憐沙上鷗忘機同野客

湘潭發舟宿武陵望桃源

解纜浮湘浦春帆帶晚霞還隨洞庭水又宿武陵花歸夢楚
雲斷聽歌山月斜桃源空極目何處是僊家

同茅鹿門賓山上人雲房晚步

披襟鹿門客攜手虎谿僧同步山中月長吟石上藤流雲時

護竹宿鳥夜窺燈萬籟此俱寂聞鐘去未能

陳芹二首

芹字子野系出交南國王永樂中避黎氏之亂來奔

南鄉有子野集鳳泉堂集

王筠詩談子野爲令九日解印歸卜居鳳凰泉之左又攜別業新林浦時垂綸其上浦有橫厓因白題曰橫厓小隱又卽邀徒步爲閣其上云邀笛閣而引騷人唱咏爲樂嘗取古高士自巢許而下迄於宋元得七十餘人爲之詩以自見其志號思古吟鳥衣衣佳話子野墨竹花草絕無俗氣文徵仲稱其竹枝清氣逼人戒門下士到金陵不可畫竹金陵有人蓋指子野列朝詩集海宇承平陪京佳麗仕宦者誇爲仙都游談者指爲樂土弘正之間顧非玉王欽佩以文章立譚徐子仁陳大聲以詞曲擅場江山妍淑士女清華

才俊斂集風流宏長嘉靖中年朱子价何元朗爲寓公金在衡盛仲交爲地主皇甫子循黃僖父之流爲風旅人相與授簡分題徵歌選勝秦淮一曲煙水競其風華桃葉諸姬梅柳蒞其妍翠此金陵之初盛也萬歷初年陳甫卿子野解組石城卜居笛步置驛邀賓復修青溪之祀於是衡仲交以舊老而莊盟幼于百穀以勝流而至止厥後軒居紛遷唱和頻烟雖詞少嘗夢入山中石梁跨道瀑布洒空洞中二老僧趺坐周繞木闌以防虎後游天台山洞宛如夢中木闌猶在問之土人云老僧化去久矣自是恍然省悟車精內典作和寒山子詩

靜志居詩話虞山錢氏序金陵祉集攷之未得其詳青溪社集倡自隆慶辛未而非萬曆初年也朱秉器停雲小志云青溪自後湖分流與秦淮合當桃葉淮明府芹卽其地爲閣焉俯瞰溪流頗有幽致歲辛未費參軍懋謙約余爲詩會其上於是地主則明府次則唐太學資賢姚與客湖胡民部世祥華廣文復初鎮參軍倬貴參軍喬棟周山人才甫盛貢士時泰任人鶯黃山人孔昭梅文學鼎祚莫山人公達汪山人

寅黃進士雲龍夏山人曰瑚紀毫州振東隣詩節經翰
汪山人顯節汪文學道貫道會沈太史懋學程文學
應魁周文學時復癸酉復爲續會則與文學子玉魏
廣文學禮莫貢士是龍邵太學應魁張文學文杜每
月爲集遇景命題卽席分韻同心投分樂志忘形間
事校評期臻雅道會錄詩若干刻之命曰青溪社稿
許石城先生敎其首續會錄詩若干吳瑞敷敎之會
余領渝邵符任參軍入與都稿遂散逸後方民部汎
葉山人之芳入焉余馳書社中期稍收輯無何胡民
部費參軍以詐誤謫黃參軍以領郡行己方民部亦
因事出盛會不常貞朋星散回首江東雲樹在望秦
淮題月闕微銷魂因紀舊遊署次其姓氏篇什如左
按此青溪社集之本未始備錢氏未見乘器小志故
也

喜諸君子入青溪社

邀笛亭前舍釣竿丹楓林外候金鞍吟邊綠酒秋初煖花底
幽盟久未寒才子一時追鄰下故人幾載隔雲端諸君莫更
輕離別萍迹應憐此會難

和寒山子詩

野日沈蒼煙樵徑斷人語眾山木葉下颯颯飛寒雨

王鑛

二首

鑛字公範閩人嘉靖甲午舉人官思明同知有治山

拙稿

到揚州

峭帆昨夜發高郵迢遞湖光萬頃秋殘月夢回清角曉榜人
來報是揚州

宿荆南普明寺

歇馬叩禪關浮生得暫閒龍堂寒月上虎渡宿僧還梵磬發
清籟曇花照古顏應憐此信宿無夢向塵寰

戊籤卷十八

薛欽

三首

欽字寅甫懷安人嘉靖甲午舉人官太平教諭有薛

博士集

林廩嘉靖福州府志教諭薛欽舉人謝啟元徐拱葉
麟俱有詩名

靜志居詩話薛君詩頗清越近於皆山樵者曹能始
序徐惟和詩云閩自林膳部後百余年而得鄭考功
又數十年而得薛博士其推崇若是

隴頭水

不向樓蘭戍那經隴水頭聲將金闕恨流作玉關愁月暗聞
笳夕風淒遷騎秋猶聞嗚咽處更在海西樓

送林天宇之桂陽

自昔衡陽外傳聞少雁過別君從此去無那故人何叢竹行

難盡情猶颯漸多相思杜蘭夕秋色滿湘波

黎陽道中有懷

河上秋風至蕭蕭不可聞蟬聲下高樹雁影出重雲古道簷
煙斷平田綠水分自能悲宋玉况是惜離羣

謝啟元

一首

啟元字本貞閩人嘉靖甲午舉人

經臨城廢縣

縣荒名不改城壞土猶存寂寂南塘路悽淒北郭門桑麻空
滿市槐柳半成村尙有履眉叟能談廢置原

明詩紀事

貴陽陳田輯

戊籤

尹臺十二首

臺字崇基永新人嘉靖乙未進士選庶吉士授編修
歷中允修撰諭德侍講遷南祭酒改北進少詹兼學

士遷南吏部侍郎就遷禮部尙書有洞麓堂集十卷

四庫總目臺以謾持揚繼盛一事爲清議所歸集首鄒
元標序稱其詩力追唐雅制疏書序記銘狀表出入
漢宋兩擇名理不屑綺語今核其所作尙不誣云
田接尙書不附和武定分宜其官南都詮都保全譚
襄敏直西苑提青詞時有諷諫大節可謂不阿當時
不以詩名撕其佳作雅質風韻不愧名家

別饒子聞

葛生在河渚
絲延自結根
何意中林楚
垂蔓相翩幡
人生託交故
義合情與存
甯期時命怫
懿好不久敦
棘瓜有芳質
三歲零寒原
幸蒙擧采惠
棄遠難重論

黃憲墓

漢季多高賢
黃生特淑妙
白璧出塵圓
羣琛仰孤照
所悲則粹質
中隕沈靈曜
雖寡河汾譏
不殊廣川調
我行歷楚墟
間道回山嶠
側思千載人
悽惻墓堂弔

寶寂寺宴集用壁間韻

尋春入始夏
嘉宴洽今時
蘿擁巖扉寂
花飄石棧危
絃歌娛日晚
車馬下山遲
坐惜華宵月
因吟鄰客詩

嘯巖寺泊

維舟依古寺解纜溯幽源花發渚煙聚草青江雨繁魚梁交
石嶼鳥路界山村坐羲垂綸者看雲過曉昏

南臺寺

竹隱珠泉溜蘿垂錦壁陰危臺迥日峻飛閣變雲深玉儕行
堪掇金芝往獨尋暫詣靈岳賞一慰尙平心

礪峯陟南禮侍余在金陵引跋迄左一觀余改北雍礪
峯入覲得覲無幾復別去作詩敘往用抒積恩

久矣金扉載筆從每嗟詞賦擅雍容那知北固煙中旆仍別
西清雨外鐘柳曲樽罍經歲憶花邊笑語幾時蓬萊出入
神仙地目極天南綠霧重

河間道中

倦客風塵未息機雙旌馬首趁殘暉渟沱水落魚龍靜返澤
春深雁鷺歸，髮虛名慙敝帚青山獨往泥征衣芙蓉玉笥
菟裘計老大空悲願每違

山行絕句二首

秋花映路開無數可愛紅枝間白枝不聽疏林黃葉墜風光
渾道是春時

漁家四五西山側苦竹陰疏自一村昨夜溪添三尺水沙鷗
無數到柴門

西湖竹枝詞

朝見南高峯欲雨北高出日又多時綠虹宛轉垂照水欲渡
無船郎得知

西湖采蓮曲

湖市羅裙映玉缸
蘇堤楊柳拂船窗
不蓮誤觸鴛鴦起飛向
花間箇箇雙

寄趙白樓總兵

上谷將軍趙白樓忠精長貫赤虹流慣馳匹馬猶深澤自射
名王黑水溝

郭朴二首

朴字質夫安陽人嘉靖乙未進士選庶吉士授編修
歷侍講左庶子侍講學士遷禮部侍郎改吏部加太子
賓客進南禮部尚書加太子少保改北尋改吏部
尚書加太子太保兼武英殿大學士參預機務加太

保少傅兼太子太傅贈太傅謚文簡有集五卷

田按史稱文簡兩典銓衡以廉著情輔政未久退歸優游林下三十年觀其詩詞從容暇豫與貴溪輩之躁進獲禱者殊科矣

閒居二首

性僻真堪隱境幽心益閒灌園安鄙事採藥理衰顏林鳥陪吟咏溪雲共往還落花苔徑滿蓬戶日當關

小築成村墅幽栖與懶宜看花聊酌酒對竹漫哦詩老眼雲山媚閒情魚鳥知獨將農圃業仰戀太平時

趙貞吉

二首

貞吉字孟靜內江人嘉靖乙未進士選庶吉士授編修遷中允擢左諭德以事下詔獄廷杖謫荔波典史

遷徽州通判進南吏部主事累遷戶部侍郎以忤嚴嵩奪官隆慶初起禮部侍郎進南禮部尙書仍留直講兼文淵閣大學士參預機務加太子太保贈少保

謚文肅有集二十三卷

田接文肅詩豪爽快字不得以成派繩之

王喬洞

柯爛人歸古木寒紺巖靈壑野雲團騎來黃鶴丹砂頂飛去青天白玉棺流水調中春欲半洞簫聲裏夜將闌思輕塵骨超千劫願遇金童捧一丸

宿蘇長公洗墨池亭作

江空草綠酒旗風半醉黃州煙雨中五百年來名輩盡有人

重唱大江東

王立道

十首

立道字懋中無錫人嘉靖乙未進士選庶吉士授編修有具茨詩集六卷文集九卷遺稿一卷

四庫總目立道詩雖微嫌婉弱而冲容淡宕不爲奇險

之語猶有中唐錢劉之遺

張怡龍湖集懋中詩冲雅駿駿入韋柳門戶槐野存笥稿懋中詩稱張司業劉隋州及索其自

作讀之果皆似

田按懋中入翰林故事館師課之而已嘉靖乙未永陵臨軒試之選三十人懋中第一懋中爲唐荆川妹胥文學歐陽詩學中唐年三十八卒同時名輩哀悼之王槐野作傅張龍湖唐荆川作志銘尹洞山作解王予哀文洞山文詞旨最美今洞蘆堂集不載當在未刻稿中也

詠史

館陶主人翁洛陽賣珠子散金買聲名寵愛傾戚里翩翩東
方生滑稽何其鄙一朝辟戰言萬乘逡巡起雄畧代所希舉
俗憎遊耳坐令狐鼠驕自日遊都市

銅雀伎

漳河流日夜歌舞未能休藍色今誰妬餘香空自留朝雲不
作雨陵樹早生秋滿目多疑壞君靈在此不

遊仙二首

仙人住玉京累劫道初成指樹元非姓殮松偶得名龍噓雲
蓋引虎奉獄圖迎相待天台路何時返赤城

玉室書名久清溪得道初赤文河上鑄鴻寶枕中書龍吐燒
丹火鸞骖度海車偶來華表上終與世人疏

泛清溪

幽尋極寥廓理棹清溪長落日照孤嶼微風生夜涼須臾遠
氣淨百里開湖光漁子相傍宿月明歌滄浪採芳不能浴悄
然悲沅湘

秋居用唐人韻二首

四戶嘵嘵亂秋陰欲上階菊花收作枕草蔓緝成鞋得句先
書壁因琴別置齋溪雲與山月總不費安排

木落隨寒雨林開際遠天水紋搖翠竹秋氣入琴絃倚樹禽
相語班荆鹿共眠機心日以盡自誣骨如仙

題顧洞陽青溪莊二首

罷官閒愈好負郭有瓜田宦味陶元亮詩才賈浪仙高齋牆

雨枕斜日過湖船誰共幽吟者空聞招隱篇

知君閉關久一徑落花深書癖年長在春盟詩至尋空山幾兩屐遠道四愁吟北望休相笑平生魏闕心

送薄醫歸江陰

遠向金門欲獻方暫因採藥去江鄉閒逕我須從蔣翊避名君莫似韓康

新學顏

五首

學顏字子愚濟寧州人嘉靖乙未進士除南陽推官
恩吉安知府累遷布政使入爲太僕卿改光祿以右
副都御史巡撫山西召爲工部侍郎改吏部有兩城

四庫總目學顏詩格律清整蹊徑尚存不脫歷下流派
升菴集瀑布詩人盛稱廬山雁蕩亦有之地志云廬
山循崖直下不如雁蕩之飛梁飄散而可觀也吾蜀
梁山縣蟠龍山有之與雁蕩相仍斬兩城云大勝雁
山有詩云神女碧瑤簪明珠構瓊瑤纖手按傾珠鉤
臺舞天樂仙人璇玑玉珊瑚晚跨蒼龍謁帝闕醉舞
婆娑渾忘卻天風吹桂翠微間

田按子愚頗擅才華集中有七諷解嘲等篇類以作
者自命詩則古體摹襲前人時有佳篇近體率意頗

府余檢明史子愚巡撫山西時應詔陳言數陳懇切
深中時鄒而兩城集不存此篇則編集者之過也

長安道

金絡青絲韁翩翩紫駒馬白面誰家郎借問冶遊者調笑章
臺側繁縟垂楊下垂楊繆繆白日長墻頭春酒雙金香高樓
思婦舉珠箔碧草如煙空斷腸

東京歌

濯龍門前車馬流無人不道入青樓
盧家少婦鳴箏坐蓬蓽春光不解愁

渭城曲

春風送客渭城西折柳亭前落日低驅馬漸隨塵影沒黃鸝
飛上戍樓唳

陽春臺

陽春臺上雪霏霏漢水無情日夜歸楚客不知何處去歌聲
猶逐綠雲飛

卽事

石磴參差蔓薜蘿空亭獨坐夕陽過不知溪上秋多少但覺

尊前落葉多

王維楨

六首

維楨字允甯華州人嘉靖乙未進士選庶吉士授檢討歷修撰諭德遷南國子祭酒以省母歸值地震陷死有槐野存稿二十卷

藝苑卮言王允甯詩如馬服子陳師自作奇正不得

兵法又如項王唱嘯未了忽發喑嗚

詩藪嘉靖時爲杜者王允甯孫仲可爲六朝者黃勉之張愈光允甯於文矯健勉之於學博洽皆勝其詩列朝詩集允甯論詩服膺少陵自謂獨得神解尤深於七言近體以爲有照應開闢鍵頓挫其意主興主比其法有正挿有倒挿而善用頓擇倒挿之法者宋元以來惟李崆峒一人及其自運則從榮枯灑落潤澤瑞滿紙如潦倒措大經書講義填塞腹笥拈題監議十指便如縣錐累人捧腹良可一笑也

田由按允甯與張太谷書云本朝作者空同聖矣卽大復猶卻數舍若倒挿頓挫之法自少陵後善用之者餘空同一人而已牧齋培塿崆峒故於允甯魂詆不遺余檢何元明四友齋叢說云許石城得蘿東橋

文衡山茶林屋王雅宜諸人詩裝成卷求槐野跋語
槐野逐句破調無一當其意者信乎天道好還宜來
之說亦爲牧齋之論所懾耳允甯五律亦有佳篇竹垞有句無篇

送駱太史謝病歸湖州

忽謝金門直言尋碧海濱明時豈無意旅病苦傷神白髮愁
中長青山夢裏真知非鷗鷺但暫與薜蘿鄰

廣德寺送別陳子

俱是游京國獨憐尋故山鄉心因子勦別句對僧刪枯沼風
荷咽空林夕鳥閒前程愁欲暮乞與一燈還

孝烈皇后挽歌

範內留芳訓扶天有駿功仙遊知跨鳳聖念爲當熊玉珮虛
無裏蒼雲悵望中宜春花照眼淚灑舊時叢

長陵恭謁

文皇陵殿傍層庸覽盡千峯壯此峯石壑蒸雲蹲虎豹玉泉含霧卧蛟龍舊京想像明王祚窮漠淒迷破虜蹤埋劍藏弓元勝地晚來時望紫氛重

春意

春意今朝動鄉關萬里遙客心共江柳日夜緒千條

苦熱行

海上三山寒色開丹梯何處陟崔嵬道人畫臥洪鑪裏赤腳蒼崖夢往來

劉繪

五首

繪字子素光州人嘉靖乙未進士授行人遷戶科給

事中轉刑科右給事中出爲重慶知府有嵩陽先生

集二十卷

四庫總目繪詩局度宏整而乏深致文不加修飾暢所欲言効直言一疏但以不戴所賜香葉冠激世宗之怒則非諫臣之體案明史貞言本傳稱賜香葉束髮巾言謂人臣非法服不受帝積憤欲去言嚴嵩因得聞之至言得罪下獄帝猶及前不戴香葉冠事據此則繪是疏或當有所受之歟
列朝詩集子素長身電目高準修鬚好讀左氏縱橫家言幹劍蹤韜挽六鈞弓揭鼓亢歌喜通輕俠計偕入都溢陽王生引少年數十輩逆之邯鄲道上校獵縱酒聲滿燕趙間矣成進士與李開先唐順之趙時春爲文章意氣之交在省垣值貴溪用事抗疏詆謔上頗是之貴溪度無以難乃遣客李寔以相術來說行子素怒掉罵杜下已而從給舍壽貴溪貴溪手玉碗會貴溪再相噦南省論罷乃潛治陂池種魚十萬頭頭易樹千章盡有蒹葭蓼蘋牛羊豚豕之利又賣僮易

鹽鵝馬課其入息身與俠少年射獵熊山下得禽直
自撰歌曲以娛其母晚年酷好櫓蒲病癢以死子
素文章雄健可喜其詩才氣奔騰而風調未諧多生
痛慕兀之致皇甫子循敘其集云先生應詔諸疏經
術文章可謂兼之若騷賦詩歌則固北海餘聲宣城
寄興非所專好也知吾哉
梁園風雅嵩陽先生放歸益治立湖別墅移石成奇
峯灌水爲巨浸花林竹嶼壯麗甲於汝南先生與賓
客放浪賦詩以此自娛其詩宏博整贍浩渺渾深披
潘陸之晨葩摘顏謝之春藻蓋光黃之奇偉人也
田按山陰周祚吳縣黃省曾作書推挹李空同空
集亦附于其書附後劉子素亦作書推服楊升菴升菴
對閱尤亞虹掣電振耀宇內知足下爲相如揚
蜀賀聲雄集以其書附云僕之仰足下者有年方其挾策西
游於都下知足下爲劉向王褒其人也至攬時吐
足下爲鮑明遠謝立暉其人也及今成集所著士人所傳傷時
述懷其孤懷結憂之聲惆流離歎琅尾者又競英綴
作者詩則有偉特之句而鮮完善之篇豔曲麗歌尤稱

爲猥下趙彥復梁園風雅舍李川甫而錄子素非識
此聽真者也

送顧聖少遊蜀中便寄渝州諸君子

天涯飄泊闔閨客仗劍萬里還西行秦姬當爐作吳曲爲君
勸酒春風生高歌壯遠遊三杯與君別匹馬遙衝劍閣雲征
衣直拂峨眉肩雪江空學芙蓉萬壑披雲松歸泛巴渝水聊醉
金碧峯棠溪花正豔安居酒復濃城中士夫多豪賢客中相
見應相憐畫舸弄杯送明月古臺搖筆凌飛煙儻憶往年一
相覩慙慚爲我傳芳信離亂中原尚有子兵戈滿地雙蓬鬢
塵海萍蹤無定居夜魂巴峽幾淒涼秋風送客腸應斷莫怪

山人懶作書

劉生

銅焦響玉營殺虜度龍庭代馬雪中躍吳刀掌上鳴醉過平
樂觀叱咤羽林兵恩子空託姓黎火照殘經

紅門晚眺西山蘭若寄翠禪師

丹梯拂玉繩羈嶺俯峻嶒月色連三殿嵐光度五陵花壇應
說法竹院已燃燈何日天台路閒尋出世僧

薔薇花下聽鄰筆

窺妝羞楚女翦綵笑吳宮總翠偏繁霧叢香易惹風葉嬌才
半綠花亂不全紅未待銀箏送先令玉鉦空

挽唐荊川

扈蹕當年染玉毫山中較獵挽烏號英魂一夜歸何處怒湧
江潮百丈高

趙大佑

一首

大佑字世微台州太平人嘉靖乙未進士除鳳陽推
官徵授監察御史厯大理丞進少卿累遷僉都御史
進刑部侍郎遷南刑部尙書就改兵部參贊機務有

燕石集四卷

弇州山人續稿燕石詩和平朗爽有朱絃疏越之音
五言古近體尤自長城

寄衡川諸君

生涯歸去未全貧斗酒猶堪共論文何日雨中能過我幾年
花下憶逢君郊扉習靜臨流水草閣抽思對野雲小徑舊曾
留輒迹可令緩鶴笑離羣

林廷機

三首

廷機字利仁閩人尙書瀚子嘉靖乙未進士選庶吉
士除檢討遷國子司業進南京祭酒就選太常卿擢工
部侍郎改禮部進工部尙書復改禮部贈太子太保
謚文僖有世翰堂稿十卷

東南嶠外詩話林文僖有遊虎邱七律云雲梯石磴
望重重拄杖來登最上峯竟日微風生院竹半窗飛
霧項山松何人能識縷金字往事空留試劍蹤爲愛
老僧頻薦茗夜歸還叩上方鐘按虎邱寺中舊有王
子吳鼎寺僧雖寶之而不詳爲何物郡志亦闕焉余
爲按薛氏鐘鼎款識釋其疑滯徵詩錦續遂爲吳門
第一吉金與焦山無事鼎並有千古矣文僖此詩第
五句卽指此鼎可知當時已有賞識之者而顧伊人
作虎邱志尙以爲大否極可發一笑也

田按余檢世翰堂稿文僖遊虎邱詩第五句係何人
舊築藏書室疑梁君所見別一本也

徐氏園林自幽絕佳辰臺省并騎來亭亭落日煙蘿裊漠漠
秋雲水檻開地勝恍陪金谷宴節臨先試菊花杯曲江往事
渾如昨白首相將更幾回

鳳凰臺和李韻

鳳逝臺荒只故邱六朝往事水東流山河誰識帝王宅宮殿
空成麋鹿遊天迴煙雲開石壁日斜鷗鷺散江洲金陵佳麗
還如舊惟有登臨使客愁

歌風臺

當年歌沛上霸氣亦雄哉寂寞西京業如今只廢臺

何維柏

一首

維柏字喬仲南海人嘉靖乙未進士選庶吉士改監

察御史坐劾嚴嵩廷杖免官隆慶初召復官擢大理少卿遷右僉都御史厯左副都御史遷吏部侍郎以忤張居正出爲南禮部尙書旋罷官謚端恪有天山

草堂存稿八卷

四庫總目朱彝尊明詩綜謂維柏乞休詩云樂事尙饒
新歲月勝遊不改舊雲山乃侍其父與鄉人爲九老
會時所作今考乞休詩爲萬曆丙子得旨歸者之作
而和其父與九老韻七律二首則作於嘉靖戊申乃
幼嚴嵩後削籍歸里時作彝尊徵引偶誤殆未見此
集跋

去婦歎贈三溪包公

直木無繁柯安能附萬蘿託身苟得所時命如吾何

康太和

一首

太和字原中莆田人嘉靖乙未進士選庶吉士授編

修歷春坊諭德侍講學士遷南禮部侍郎就遷工部

尚書有礪峯集

蘭陔詩話礪峯在翰苑二十年閉戶著書屏迹樞門人譏其拙作拙宦對以述志致仕時值萬中倭亂寓嘉禾四年始歸其詩有白髮多情催我老青山無地是吾家庭堆白骨人蹤少鬼哭荒村日色荒蕪子不知舊壘破呢喃猶向故園歸皆淒婉可誦

寒時作

春入滄浪覓釣舟淡雲疏雨正悠悠文成祇有窮難送老至
應知歲不留養鵠尙憐雙口累看花聊減半生愁思家無計
清宵坐矯首高城月滿樓

馬森 一首

森字孔養懷安人嘉靖乙未進士授戶部主事厯郎

中出爲太平知府遷江西副使歷參政按察使布政
使就擢巡撫右副都御史入爲刑部侍郎改戶部坐
事左遷大理卿起南工部侍郎改戶部以右都御史
總督漕運兼巡撫鳳陽進南京戶部尙書改北贈太子
少保謚恭敏有鍾陽集

塞下曲

列戟牙旗五色高碧油幢裏醉葡萄可憐營外風沙起夜夜
征人枕大刀

張舜臣

一首

舜臣字熙伯章邱人嘉靖乙未進士累官戶部尙書
左都御史贈太子少保

山寺

休沐依山寺行行石澗中誰令朝市客盡日坐松風

孫植一首

植字斯立平湖人嘉靖乙未進士除南刑部主事累
官刑部尙書贈太子太保謚簡肅

諸省丈遊西山以病不赴

聞道香山寺龍宮倚石岑泉聲來樹杪雲氣接峯陰路嶮丹
梯峻檻臨碧澗深無能陪妙躅延望發孤吟

張瀚二首

瀚字子文仁和人嘉靖乙未進士授南工部主事厯
郎中出爲廬州知府改大名累遷陝西布政使就遷

巡撫右副都御史入爲大理卿進刑部侍郎改兵部

總督漕運改督兩廣軍務以事鐫秩歸起撫陝西遷

南右都御史就改工部尙書召拜吏部尙書加太子

少保以忤張居正罷歸贈太子太保謚恭懿有奚囊

蠹餘二十卷

田按尙書始附和江陵及江陵奪情卒能持正世以
此多之詩乃平平

次韻答沈鴻臚

詩篇推正始今復見雲卿錦字湖天遠塵心淮海清尊鱠秋
日思猿鶴故山情和靖虛懷社因風憶友生

雨夜

積雨凝陰二月寒長宵寂寂坐來殘獨啞應有張平子賦得

閒愁祇自看

陳鳳六首

鳳字羽伯上元人嘉靖乙未進士除南陽推官改彰
德徵授刑部主事厯郎中出爲江西僉事厯四川陝
西參議有清華堂摘存稿六卷

馮汝訥光祿集羽伯五古初政唐人局鑰後入晉魏
閻與七言歌行豪逸雄俊真得盛唐三昧五七言近

體雅秀清暢王孟之流

楊慎升菴遺文羽伯古詩漢魏遺響近代所僅見七
言長歌與盛唐諸大家埒能爭勝而尤難者在自成

家而不蹈襲非過目折沈之敵

藝苑卮言陳羽伯詩如東市倡慕青樓價微傅粉澤

絕工錦美

帝里明代人物畧羽伯官刑部主事署中故有白雲
樓暇日與文學僚友眺詠其上稱爲西臺雅集
列朝詩集嘉靖中賴華玉以淵藉家居倡詩學於青
溪之上羽伯及謝應午許仲貽金子有金子坤以少

俊從游相與講藝談詩金陵之文學自是蔚然可觀
出按羽伯五字詩華妙弇州擬之東市倡無乃唐突

攝泉居士許公

玄度邱壑姿投刪事間寂治生不厭餘取足在惟適作詩謝
雕纘青山恣游歷平生所交親白首共欣戚子也青雲器才
任萬人敵文采照當世藝苑樹奇績悵望攝山泉悽惻山陽
笛

惜別行送朱子平甫使江南

惜別復惜別四牡行行俱吳越長安有客正思歸因君夢遷
秦淮月通籍金門今幾秋長安共卧省中樓相逢日夕共傾
倒劇談大笑輕五侯予本滽蕩人君亦躋弛士感君意氣爲
交歡豈識人間別離事盛年藝苑擅風流況復經過六代邱

江上停舟應弔古爲予先賦白蘋洲

雨中酬諸君見過

久雨空堂靜高人載酒過布袍同濩落長鋏任悲歌水氣浮
高柳秋容入敗荷明朝是九日無菊欲如何

同孟孔彰秋日偶然作

久緣朱紱累夢斷白鷗羣幾對宛城月遙憐鍾阜雲開簾看
秋色散帙坐斜曛絡緯催寒急淒淒不可聞

秋日登雨花臺

落葉山中寺秋風江上臺鳳城雙闕迥半渚片帆來繁吹暮
仍急清樽醉復開東籬菊尚晚留取盡餘杯

舞陽縣舞泉書院

碧甃春泉出青皋夕照懸聊因謝簿領暫得眺山川綺閣樓
林杪瑤峯落檻前柳隄晴正媚麥壠氣初暄雲物還茲土絃
歌感昔賢晚來饒吹發歸鳥散林煙

林鷹嶽 一首

應麒字必仁仙居人嘉靖乙未進士除吳縣知縣遷
惠州同知有介山稿

行路難

白日在天難照陰青銅作鏡難照心古來怨士悲白璧至今
讒口銷黃金我欲歌此曲此曲哀已深不必漸離筑不必雍
門琴不必楚妃歎不必梁父吟君不見伯奇履霜申生死子
晉浮草蘆均沈精誠不鑒君與父他人悠悠復何憇

田按此詩仙居志作張伯厚詩依戚學標三台詩錄
採入介山稿

牛恆

二首

恆字槐亭武工人嘉靖乙未進士官周藩左長史

因樹屋書影牛左史周藩宮詞詩雖不多可代夢華
錄數卷

周藩宮詞

二首

春殿牙籤萬軸餘香勻風細綠窗虛侍兒臨龍誠齋帖爾出
先呈女校書

吹蘋南下令婆墳憶昔從王掌祕文今日綺蘿何處是野花
覬鳥自紛紛

施峻

一首

峻字平叔歸安人嘉靖乙未進士除南刑部主事歷

郎中出爲青州知府有漣川集八卷

藝苑卮言

施平叔如小邑民築室器物猶完

田按平叔七言如南嶽先生句曲去東林長老沃州

還藥欄當午蜂偏亂釣檻平溪水不渾河橋細雨舟

初泊山郭寒煙梅半開未信年華欺客鬢也知春色
到鄰家殊自清脫

過南郭野寺

休沐出南郭尋僧一扣闕孤燈燃白晝疏磬滿秋山東帶經
年苦看雲盡日間齋廚清供罷鶴欲飛還

趙統二首

統字伯一臨漳人嘉靖乙未進士官戶部郎中有驪
山集十四卷

宿土門

帝命辭金闕客身宿土門星河虛草閣山壑會花村縱飲添
山聲長歌倒瓦盆疏狂忘路遠衰薄負君恩

憶魚池灣舊遊

秦王陵下魚池灣斷葦荒蒲近對山白酒黃雞秋興在太平
只欠一身閒

陳述三首

述字德輝閩人嘉靖乙未進士除大理評事出爲安
慶知府厯兩淮運使廣西參政廣東布政使有集四

卷

田按德輝五言清拔惜不得其全集錄之

粵西松樹

蒼蒼庭下松枝榦碩以修才質詎不美郢匠那見收淒風薄
松枝鳴聲何悲愀悲愀不可識無言以意諷炎荒土氣溼宅
字材易益竹雞久不鳴白蟻爲冠儻所以梁棟委棄置於林
邱南橘北爲枳土地職其由移之植徂徠山川邈且道所期
飽霜露歷歷春復秋流膏伏龍虎仙鼎終相求

登粵山謁諸葛廟

諸葛龍卧時聞達非所志三顧勞賢主出門答高誼恢復雖
未竟忠誠震天地千載出師表何人不垂涕王公斯文宗今
古若神契門山靈酌陽廟建風化係伊余謁遺像維時適清
露躡崖縫遊談攀風吹衣袂衡獄青冥中洞庭一何絶落日
散餘霞長空一鳥逝回輿下山阪惆悵白雲際

下邳懷古

汎舟臨古甸荒郊起遐思猶聞石家城復憶圯橋屢滾滾黃河流蕭蕭馬陵樹今人更來過昔人知何處落日滿津樓踟蹰未能去

許穀

四首

穀字仲貽上元人嘉靖乙未進士除戶部主事改禮部吏部厯員外郎中遷南太常少卿謫浙江運副遷江西提學僉事進南尙寶卿有省中稿二卷二靈稿

二卷歸田稿十卷

四庫總目穀詩格頗俊爽當其合處時得古人之意而失於芟擇
四友齋叢說余戊午年致仕南都諸公押衡山鷺字韻詩贈獨許石城一聯云買得幽池堪鬪鵝種成芳

樹好藏鶯殊有雅思

續金陵瑣事石城許公有句云平生愛我無如酒凡

事輸人不但基薛方山極日稱之

列朝詩集仲貽爲顧華玉高第弟子風流儒雅以耆

宿主盟詞壇蓋先後相望云

靜志居詩話石城詩頗似大歷十子

按仲貽律尚華整茲錄其有清思者

過吳門訪文丈

吳門風雨獨停舟重訪仙人洞壑幽錦字滿床多逸興碧梧
百尺自清秋久拋金馬心逾遠一笑青山意總投慙愧十年
塵土客又將書劍出皇州

寄孫學職

歲首蒙君問謫居冰霜忽訝嚴將除風前苦憶瓊枝樹海上
欣傳白雁書賓榻久懸殊有待雪舟重訪定何如丹山碧水

登臨地肯信年來已結廬

寄文休承

算老同驚七袞餘芳年朋輩總邱墟山中每自看梁月江上
如何斷鯨魚往日草堂頻下榻幾時茂苑再停車揮毫見說
清強在好寫新篇慰索居

謝政口號

詔過留都喜罷官罪疑遙荷聖恩寬久叨軒冕曾何補乍到
林泉已自安郭外旋分桑落酒花間新製鹿皮冠陶然自著
閒居賦晝遍聞堂竹萬竿

任萬里

二首

萬里字圖南掖人嘉靖乙未進上官禮科給事中有

梅軒詩藁

溥音集王西樵云黃門素有剛介之目以疏宮僚忤
旨放歸蓬蒿三徑巾屨蕭然詩如秋露澄江蕭森平
遠白沙錦石復饒清麗之觀五言如沙岸龍盤坼
瀆日月浮七言如不妨佳句題青竹更喜繁花媚遠
天平沙渺渺自流水芳草萋萋空好春并佳

聞笛

承恩初出塞聞笛更逢秋清比桓伊弄哀添向秀愁關山臨
夜月楊柳折邊州一曲那能盡淒涼欲白頭

過戰場有感

萬里秋風吹朔漠千年營壘落寒雕水聲不住東流去疑是

秦人怨未消

陳棐 一首

裴字口口鄖陵人嘉靖乙未進士厯禮科戶科給事

中累遷右僉都御史巡撫甘肅有文岡集二十卷

權店驛

盤陀南來一百里宛如閣道獨門行荆扉茅屋人家少盡日
潺湲聞水聲

薛應旂

一首

應旂字仲常武進人嘉靖乙未進士除慈谿知縣遷
南吏部主事厯郎中出爲浙江提學副使改陝西有

方山集

四庫總目應旂識勢論稱黨鋟興而漢社屋元談盛而
晉室傾清流濁而唐祚移學禁作而宋舟覆其初文
雅雍容議論標致不過起於一二人之微勝而其究
乃致怨惡拂勝於賓中干戈相尋於海內而潰敗不

可收拾云云若於七八十年之前預見講學之亡明
者篤論也

答鄭嘉興

驛舍臨西水相逢鄭子真幽懷在空谷征旆尚風塵日暮憐
漂泊途窮念苦辛文翁元愛士應不爲官貧

陳堯一首

堯字敬甫南直隸通州人嘉靖乙未進士除工部主
事厯員外郎中出爲台州知府改南安厯長蘆鹽運
使廣西參政貴州按察使雲南廣西布政使以右副
都御史巡撫四川遷南戶部侍郎改工部總理河道
召拜刑部侍郎有梧岡集十卷

姑蘇竹枝辭

洞庭山高十二峯
洞庭湖上采芙蓉
山高水遠不歸去
風雨來時愁殺儂

盧宗哲一首

宗哲字濬卿德州人嘉靖乙未進士選庶吉士授檢討遷南司業厯南太僕卿改光祿卿有焚餘草

贈張錦衣

朝承節鉞下丹霄
霜滿熊轎龍賜貂
路繞黃河山簇簇
風鳴青海草蕭蕭
油幢對月閒吹角
鐵騎乘冬好射雕
爲報諸蕃莫輕入
臨戎今是霍嫖姚

劉佐一首

佐字一軒德州人嘉靖乙未進士官參議有遂初堂

詩

宿明月寺山房

梵響侵層漢雲香護石牀鶴巢藏古木僧影下長廊良夜催
銀箭天河發曉光明當醉枕字暫爾聽寒聲

郭萬程

一首

萬程字子長閩清人嘉靖乙未進士官刑部主事有
雲橋集

送翁源尉

北客日歸南南鴻亦復北送子出郭門令人心忽忽

駱文盛

一首

文盛字質甫武康人嘉靖乙未進士選庶吉士授編

修有兩溪集十四卷

四庫總目文盛詩文於淺弱之中時有清遠之致文盛官翰林時以不附和嚴嵩移疾不出後貧病垂死有以千金求居間者揮之至沒無以葬其胸次本高故吐言不俗

訪友途中滯雨

長河波浪渺無津疋馬西風日易曛客舍況逢三日雨故人猶隔數重雲山容慘淡當窗見鳥語啁啾近水聞信有路難行不得旅愁鄉思益紛紛

陳策 一首

策字時偕莆田人嘉靖乙未進士官台州知府

九鯉湖

羽人一去不復還湖上猶傳九鯉仙流水閒雲空裏處碧桃

春草自年年誰從深洞招真隱剩有丹邱認宿緣中夜夢殘
樓閣迴一聲海鶴上青天

鄭富一首

富字中虛莆田人嘉靖乙未進士官潮州知府

送馬從甫還莆

握手難爲別裴裘雪水涯壺公知不遠送爾躡層霞

汪宗凱一首

宗凱字子才崇陽人嘉靖乙未進士厯官尚寶卿有

棠谿集

人日同傅山人宿灌谿寺

人日珠林集春懷此暫開松雲巖古殿蘿月映蒼苔池卽諸

天上人傳一妙來十年同覽眺徒倚雪峯隈

李樂一首

樂字和仲瀘溪人嘉靖乙未進士授南吏部主事歷郎中出爲河南參議累官太僕卿

沅湘耆舊集和仲游湛甘泉之門清苦嚴正人皆憚之詩格清老如野澗花深蜂餽蜜上方鑑定鳥窺人名句也

鹿泉洞

石洞冥冥傳有仙太康之後今何年蘭香芷頽浮晴川夾岸桃花紅欲然洞中幽曠琪草玄冰崖玉篠生秋妍懸泉瀉出碧漪蓮誰傍春叢一繫船愧無新詞石上鐫舉頭拍手望青天

胡汝霖

一首

汝霖字青崖綿州人嘉靖乙未進士累官都御史

岳陽樓

岳陽樓閣倚雲閒漢酒風濤日夜來欲弔湘壘招楚客漢庭
零落賈生才

饒相

一首

相字志尹大埔人嘉靖乙未進士官副使

和州道中見隱者山居

曉發和陽城飛輿度平陸遠眺翠微中炊煙起空谷竹木翠
交加深藏隱者屋我來憇其下幽徑何紓曲嗟我事軒冕半
生空碌碌長謝青雲客躬耕南山麓

洗桂奇

一首

桂奇字奕倩南海人嘉靖乙未進士官工部主事
飛雲頂

振衣千仞上浩浩御天風恍惚聞仙樂依稀驚彩虹秋雲半
嶺白海日五更紅從此忘歸路優游四百峯

黃釧

一首

釧字珍夫安溪人嘉靖丁酉舉人官溫州同知禦倭

被執不屈死贈浙江參議有壁樵錄

田按珍夫死倭難王弇州爲作葬衣冠志又輓詩云
割後吳鄉空有舌哭回泓演已無肝

野望

蓮朝微雨恰新晴沙草含風軟綠平碧水漁人歸棹去夕陽

煙樹一痕清

陳紹文

一首

紹文字公載南海人府尹錫子嘉靖丁酉舉人官通判有中閣集

田接公載乃應天府尹錫子府尹構浮邱心遠亭擅
園林之勝黃才伯有心遠亭分韻詩云浮邱倚蘭渚
鑿水環山郭中流結衡宇炎歎轂銷落黎瑤石有心
遠亭採梅詩云京兆池亭萬樹芳半臨秋水半含霜
紀其勝也璠石有心遠亭公載浮邱心遠亭聽公載彈琴
諸詩公載以羅浮有中閣自號中閣山人集名以此
公載與宋公貴歐楨伯黎瑤石吳而待諸人結詩社
又同董卿才伯之門見楨伯所作梁比部傳中竹垞
錄公載詩不能詳其學余爲考其詳如此

游梁惟和北園

地迴揚雄宅煙深向秀園泉光分洞口山翠溼籬根選石安

棋局臨花設酒樽莫愁歸路晚明月映柴門

蔡宗堯

二首

宗堯字中父臨海人嘉靖丁酉舉人授松陵教諭遷瑞金知縣改富寧有龜陵集二十卷

西津舟泊

薄暮西津下孤燈歇雨時客懷惟酒賦春事有梅枝月落村
春急風寒夜棹遲悠哉渾不寐高枕自哦詩

旅宿

旅宿高樓曉窗含煙霧多溪聲添夜雨山翠長春蘿越國懷
如此燕臺夢若何貪看玉樹小對酒欲長歌

陶庚

一首

庚字星子雲南府人嘉靖丁酉舉人官承天府通判
自嘲

一官微賤竟何如半畝荒園手自鋤可笑夷門老賓客等閒
卻上信陵車

郭文涓二首

文涓字稚源古田人嘉靖丁酉舉人官保甯同知有
享帚集

固鎮驛書壁

天陰野無人日夕昏氣集村暝鶴凋木落寒飆烈焰發
郵亭宵征度原隰遵歷古邱墟蕭條今郡邑微月隱帷涼寥
寥沾衣濕浮生倏如借流暑遞相及胡爲勞其生撫膺倍於

惱

銅雀臺

銅雀臺荒漳水濱
汀蒲柳亂河津古原寂寥邱煙暮廢塚
荒涼野草春一代玄宮狐兔迹千秋黃土綺羅塵
西陵尚挂松楸月不照當時歌舞人